

# Namoramentu i Madures

Ku kuantu aña un hóben por kuminsá papia ku un persona di e sekso opuesto ku intenshon pa namor'é? Ta un realitat tristu ku tin mayor ku ta laga e yu pa su kuenta, pa e mes hasi loke e ta haña ta bon. Ma otro mayor tin sierto regla. Algun ta eksigí ku e yu mester yega sièrtu edat promé. Otro mayor ta para riba ku e no por kuminsá namorá te ora e yu a kaba skol. Tur dos idea ta na nan lugá. Yunan mester resptá desishon di nan mayornan riba e punto aki.

Ma en realitat namoramentu ta eksigí algu muchu mas importante ku edat: MADURES. Nos no ta papia prinsipalmente tokante madures físiko, maske eseí ta hunga un ròl. Djis pasobra bo tin e "aparatonan" físiko pa traha òf haña yu no kier men ku bo ta suficiente maduro pa namorá. Nos ta papia mas bien di madures spiritual, mental, sikolóxico, i sosial. Ta klaro ku algun ta madurá mas rápido ku otro.

Ku madures en bista, nos ke surgerí algun rekisito pa e hóben cumpli kuné promé ku mayornan mester permitié pa kuminsá namorá.

1) E mayornan mester ta di akuerdo ku e hóben ta kla pa kuminsá namorá. No ta korekto pa e yu kuminsá namorá kontra boluntat di bo mayornan! Beibel no ta stipulá siertu edat ora e ta bisa, "Yunan, boso obedese boso mayornan..." (Efesionan 6:1). Mayornan ta deseá lo mihogá pa nan yunan i tin bon motibu pa nan eksigensianan. Un yu muhé ku ta papia ku un yònukan kontra boluntat di su mayornan ta buska problema pa su mes. Un yu hòmber ku ta sigui mantené kontakto ku un yùfrou maske su mayornan a bis'é "E mucha muhé ei nò!" lo yora lat ta malai.

2) E yu mester ta konsiente di e benefisionan i peligernan di namoramentu promé ku e por kuminsá namorá. Hopi hóben tin e impreshon ku namoramentu ta enserá benefisio so. Ora bo ta enamorá, bo tin un hende ku ta tratábo manera bo ta masha spesial, un hende pa pasa dushi tempu kuné, un hende spesial pa konta tur kos, un hende ku ta interesá den bo persona.

Ma hopi hóben ta siegu pa ku peliger ku ta skonde nèt banda di e ruta romántiko. Méskos ku tur amistat, e persona ku bo ta namorá lo tin hopi influensia riba bo, sea pa bon òf pa malu. Djis pasobra e persona ta atraktivu no kier men ku e ta bon hende. Kòrda tambe ku namoramentu ta guia den direkshon di matrimonio. Una bes bo a kasa, ta pa bida largu. "Mi ta odia divorsio," Dios ta bisa (Malakias 2:16). P'eseí bo mester ta masha kouteloso ki sorto di persona bo ta namorá. Ademas tin tentashon durante e temporada di namoramentu. Dios ta prohibí tur relashon seksual promé ku matrimonio. Bo mester prepará pa resistí kontra e tentashon aki promé ku bo ta kuminsá namorá.

3) E hóben mester tin reglanan pa ku namoramentu promé ku e ta kla pa kuminsá namorá. Pa hopi aktividat den bida tin regla: pa sambuyá, kore outo, na trabou, hunga futbòl, èts. Ma straño ku por parse, ora ta trata ku un di e desishonnan di mas importante di bida (matrimonio), nos ta funshoná a base di sintimentu i ta pone faktoran obhetivo i reglanan un banda.

Ta bon pa hóbennan SKIRBI e reglanan. Esaki ta obligá nan pa formulá nan mas mihogá. Por tin reglanan relashoná ku e tipo di persona ku bo ta namorá, e sitio (sano) ku boso ta bai, e tempu ku boso ta yega kas (no den madrugá), presensia di otro hende (no boso dos apartá), limitá kontakto fisiku (no "all the way"), èts. Tur esaki mester ser pensá adelantá! Beibel ta duna algun bon guia riba e punto aki.

4) E yu mester dediká su mes pa mantené na e reglanan aki, kuesta loke kuesta. Lo no ta fásil. Si e tin reglanan stabil, lo e ser tentá pa bandoná su reglanan bes tras bes. Ma si e ta asina KONVENSE ku e reglanan ta korekto, ku ta preferá pérde su namorado/a ku violá su konsensi, anto su mayornan no tin mester di preokupá. I despues ku e kasa, e hóben lo yama Dios danki ku e tabatin reglanan stabil pa guia su namoramentu.

Talbes nos surgerensianan por zona antikuá. Ma un hóben ku ta tuma nan na serio, lo evitá un bòshi di problema. E no ta un hende ku ta biba pa awe so; e ta pensa di futuro, i pues ta demonstrá madures pa ku namoramentu.